

# Ir cun scolaras e scolars en il gaud

Partenza da la campagna «il gaud sco lieu da scuntrada»

■ (cc) Ina lavur da publicitad persistenta e vasta sto er integrar las scolas. Pervi da quai èn s'unids la «economia forestala svizra», l'associaziun dals selviculturs svizzers, la direcziun federala da selvicultura, ils chantuns e l'institut federal per la perscrutaziun da gaud, naiv e cuntrada GNC per lantschar la campagna naziunala «il gaud sco lieu da scuntrada – la purschida da scola da l'economia forestala». La campagna che vegn fatga ils onns da scola 04/05 e 05/06 duai dar impuls per ina lavur da publicitad forestala orientada al futur. L'organisaziun naziunala per la furmaziun da l'ambient e per il gaud Silviva coordinescha las activitads e procura per il sustegn necessari da las acturas e dals acturs. La finamira principala a lunga vista è che mintga uffant en Svizra duai vegnir accompagnà almain ina giada en il gaud tras persunal forestal professiunal.

## L'uffizi forestal dal Grischun sustegna questa campagna

L'uffizi forestal vul promover ed accompagnar activitads en il senn dal «gaud sco lieu da scuntrada». Las suprastanzas communalas dal Grischun, las direcziuns da scola ed ils manaschis forestals communalas duain vegnir appellads uschia, ch'els daventan cuminaivlamain activs sco partenaris decisivs.

## Betg inventar da nov la roda

En bleras vischnancas dal Grischun han

lieu mintg'onn numerusas occurrenzas en il gaud. Igl è evident che questas activitads exemplaricas duajan vegnir integradas da l'uffizi forestal dal Grischun en la campagna «il gaud sco lieu da scuntrada».

### L'uffizi forestal vuless–

- che las represchentantas ed ils represchentants da las vischnancas, dals servetschs forestals e da las scolas che n'han fin ussa anc betg lavurà ensemble, sa motiveschian vicendaivlamain e sa scuntran per daventar activs;
- che las vischnancas fetschian che occurrenzas da scola en il gaud davegian ina tradiziun;
- activitads existentas vegnian duvradas sco impuls per novas activitads;
- ch'igl hajan lieu en il Grischun – sche pussaivel – dapertut e regularmain occurrenzas da scola en il gaud.


### Per cuntanscher questa finamira porscha l'uffizi forestal il suandant:

- infurmar en moda generala tut las persunas participadas davart «il gaud sco lieu da scuntrada»;
- mussar co ch'ins po cuntanscher las finamiras da questa campagna;
- rimnar ed intermediar las purschidas e las ideas existentas;
- servir sco post da consultaziun per dumondas en connex cun ils projects da scola en il gaud;
- svilupper novas ideas e furmas per talas occurrenzas.



Reconstruir «l'istorgia da la naiv» da quest inviern cun examinar ils cuflads.

FOTO L. WALTHER



La vischnanca, la scola ed il servetsch forestal pon fixar cuminaivlamain las finamiras per occurrenzas da scola en il gaud uschia, che mintga vart profitescha.

## Fixar la finamira giavischada

	servetsch forestal	vischnanca	scola
<b>finamira</b>	<ul style="list-style-type: none"> <li>• il servetsch forestal po declerar sias activitads</li> <li>• in engaschament da scolaras e da scolars è pussaivel</li> <li>• dapli reconuschientscha</li> </ul>	<ul style="list-style-type: none"> <li>• scolaras e scolars enconuschan il servetsch forestal d'emprim maun</li> <li>• votantas e votants futurs enconuschan servetschs impurtants d'in manaschi da la vischnanca</li> </ul>	<ul style="list-style-type: none"> <li>• intermediar temas teoretics en il gaud vivent</li> <li>• spezialistas e spezialists sustegnan las occurrenzas</li> <li>• bleras pussaivladads da pudair far experientschas</li> </ul>
<b>activitads</b>	<ul style="list-style-type: none"> <li>• concepir las occurrenzas areguard il cuntegn (cun la magistraglia)</li> <li>• preschentar sias activitads</li> <li>• organisar, reparter e diriger las lavurs praticas</li> </ul>	<ul style="list-style-type: none"> <li>• decider davart la collavuraziun da la scola e dal servetsch forestal</li> <li>• fixar las activitads</li> <li>• sustegnair e coordinar las iniziativas/ils giavischs</li> </ul>	<ul style="list-style-type: none"> <li>• concepir las occurrenzas areguard il cuntegn (cun las selviculturas ed ils selviculturs)</li> <li>• intermediar ils cuntegns en moda adattada al stgalim</li> <li>• responsablada per las classes e per la disciplina</li> </ul>